



*La vefue Ruth fuiuant Noëmi fa belle-mere vient en Bethléem,
& espoufe Booz.*

DV temps que les Israëlités estoient gouvernez par leurs Iuges, aduint entr'eux vne grande famine, laquelle pour euitter Elimelech s'en alla en la region de Moab avec sa femme Noëmi, Mahalon, & Chelion, ses deux fils, qui prinrent femmes estrangeres en ce lieu-là, à ſçauoir Ruth & Orpha, qui apres auoir conuerſé au pays dix ans, ils moururent, comme auſſi fit Elimelech. Cela fut cauſe que Noëmi ſe voyant priuée de mary & d'enfans, voulut retourner en Bethléem: mais Ruth vefue de Mahalon ne la voulut abandonner, luy diſant, que ſon Dieu eſtoit ſon Dieu, & ſon peuple ſon peuple, proteſtant qu'elle mourroit avec elle. Ils ſ'acheminèrent donc en Bethléem, où le peuple admira leur venuë, qui fut au temps qu'on moiſſonnoit; & Ruth alla glaner au champ de Booz, qui vint voir les moiſſonneurs, & leur dit : Dieu ſoit avec vous; auquel ils reſpondirent, Le Seigneur vous benie. Puis Booz ayant contemplé cette Ruth estrangere glanant en ſon champ; & ſ'eſtant enquis qu'elle eſtoit, donna charge de la laiſſer glaner, & luy donner ce qu'elle auroit beſoin. Ruth doncques obtint telle grace enuers Booz, qu'enfin ſ'eſtant trouué qu'il la deuoit épouſer, au refus d'un plus prochain, il la prit pour femme, & engendra d'elle Obed, & Obed engendra Iſay, qui fut pere du Roy Daud.